

lamentación técnico-sanitaria específica dos preparados para lactantes e preparados de continuación, publicado no «Boletín Oficial del Estado», suplemento número 9 en lingua galega, do 19 de agosto de 2000, procédese a efectua-la oportuna modificación:

Na páxina 639, segunda columna, artigo único, punto 1.5, última liña, onde di: «... productos sanitarios.», debe dicir: «... productos fitosanitarios.».

MINISTERIO DE FACENDA

18912 *REAL DECRETO 1732/2000, do 20 de outubro, polo que se modifica o Regulamento do imposto sobre a renda das persoas físicas en materia de retencións e ingresos á conta sobre rendementos do traballo.* («BOE» 253, do 21-10-2000.)

A sentenza da Sala Terceira do Contencioso-Administrativo (Sección Segunda), do Tribunal Supremo, do 19 de maio de 2000, anulou diversos aspectos do procedemento de cálculo das retencións sobre os rendementos do traballo, previsto no Regulamento do imposto sobre a renda das persoas físicas, aprobado polo Real decreto 214/1999, do 5 de febreiro.

O alto tribunal analizou o sistema de cálculo das retencións sobre os rendementos do traballo no contexto do novo imposto e considerou que o principio prioritario que debe estar presente na regulación das retencións non é outro que o da máxima personalización e individualización no cálculo da retención, para conseguirla maior equivalencia coa tributación definitiva.

Co obxecto de incorporar ó regulamento do imposto o sinalado polo Tribunal Supremo, naquelas materias que son susceptibles dun inmediato desenvolvemento regulamentario, estimouse oportuno modificar varios preceptos no sentido seguinte:

O artigo primeiro do presente real decreto dálle unha nova redacción ó parágrafo d) do artigo 78.3 do regulamento do imposto para que na determinación da base de cálculo do tipo de retención se teña en conta o mínimo familiar por ascendentes. O mesmo tempo, neste precepto establécese o cómputo na súa totalidade dos descendentes, e non por metade, como prevía o texto regulamentario declarado nulo polo Tribunal Supremo, cando o contribuínte teña dereito, de forma exclusiva, á aplicación íntegra do mínimo familiar, manténdose para o resto de supostos o cómputo por metade.

O artigo segundo dálle unha nova redacción ó número 5.º e engádeselle un novo número 9.º ó artigo 81.2 do regulamento do imposto, para incluír dous novos supostos de regularización do tipo de retención: a variación das circunstancias dos descendentes (por exemplo se se computaron na súa metade e deben computarse na súa totalidade); e a variación no número ou as circunstancias dos ascendentes que se deben ter en conta para a determinación da base de cálculo do tipo de retención.

Agora ben, neste último caso, o dos ascendentes, a regularización poderá supor tanto unha diminución como un incremento do tipo de retención. Así, por exemplo, sería no suposto de que o ascendente que se computou na súa totalidade deba computarse por metade, ou porque non deba computarse en ningún caso.

Por último, a disposición derradeira única establece que este real decreto entrará en vigor o día seguinte

ó da súa publicación no «Boletín Oficial del Estado» e terá efecto desde o día 1 de xaneiro de 2000, coa intención de que se practiquen as regularizacións do tipo de retención que procedan de acordo coas novidades introducidas no texto regulamentario, e tendo en conta esta circunstancia, a disposición transitoria única do real decreto establece a forma de comunicarlle ó retedor a nova situación derivada das presentes modificacións, ó mesmo tempo que habilita os pagadores para practicarem a regularización en calquera das nóminas pendentes ata a fin do exercicio, e non na inmediata á recepción da comunicación, como recolle con carácter xeral o regulamento do imposto, para facilitala súa aplicación, tendo en conta o número de empresas afectadas.

Na súa virtude, por proposta do ministro de Facenda, de acordo co Consello de Estado e logo de deliberación do Consello de Ministros na súa reunión do día 20 de outubro de 2000,

DISPONGO:

Artigo primeiro. *Modificación do artigo 78 «Base para calculalo tipo de retención» do Regulamento do imposto sobre a renda das persoas físicas.*

O parágrafo d) do punto 3 do artigo 78 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, quedará redactado como segue:

«d) No importe do mínimo persoal e do mínimo familiar por descendentes e ascendentes, incluído o caso dos discapacitados, ós que se refire o artigo 40 da lei do imposto, nos termos e condicións previstos nel, sen que sexa de aplicación ningún dos mínimos persoais incrementados ós que se refire o artigo 70.2 da lei do imposto. Para estes efectos, a idade do perceptor, e dos descendentes e ascendentes que dean dereito a minoración entenderase referida á data de devengo do imposto, aplicando, ademais, as seguintes especialidades:

1.º O retedor non deberá ter en conta a circunstancia prevista no artigo 40.3.2.º da lei do imposto.

2.º Os descendentes computaranse por metade, excepto cando o contribuínte teña dereito, de forma exclusiva, á aplicación da totalidade do mínimo familiar por este concepto.»

Artigo segundo. *Modificación do artigo 81 «Regularización do tipo de retención» do Regulamento do imposto sobre a renda das persoas físicas.*

1. O artigo 81.2.5.º do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, quedará redactado como segue:

«5.º Se no curso do ano natural se producise un aumento no número de descendentes, ou unha variación nas súas circunstancias, sobreviñese a condición de minusválido ou aumentase o grao de minusvalidez no perceptor de rendas de traballo ou nos seus descendentes, sempre que, de acordo co artigo 40 da lei do imposto, tales circunstancias determinasen un incremento no mínimo persoal ou familiar.»

2. Engádeselle un novo número 9.º, ó punto 2 do artigo 81 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, coa seguinte redacción:

«9.º Se no curso do ano natural se producise unha variación no número ou nas circunstancias dos ascendentes, sempre que se producise unha variación no importe do mínimo familiar, de acordo co artigo 40 da lei do imposto.»

3. O punto 4 do artigo 81 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, quedará redactado como segue:

«4. Os novos tipos de retención aplicaranse a partir da data en que se produzan as variacións a que se refiren os números 1.º, 2.º, 3.º e 4.º do punto 2 deste artigo e a partir do momento en que o perceptor dos rendementos do traballo lle comunique ó pagador as variacións a que se refiren os números 5.º, 6.º, 7.º, 8.º e 9.º dese punto, sempre e cando tales comunicacións se produzan con, polo menos, cinco días de antelación á confección das correspondentes nóminas, sen prexuízo das responsabilidades en que o perceptor puidese incurrir cando a falta de comunicación de tales circunstancias determine a aplicación dun tipo inferior ó que corresponda, nos termos previstos no artigo 89 da lei do imposto.

A regularización a que se refire este artigo poderá realizarse, a opción do pagador, a partir do día 1 dos meses de abril, xullo e outubro, respecto das variacións que, respectivamente, se producisen nos trimestres inmediatamente anteriores a estas datas.»

Disposición transitoria única. *Regularización do tipo de retención.*

A regularización do tipo de retención correspondente ó exercicio 2000, para a aplicación das modificacións introducidas por este real decreto, poderá realizarse do seguinte modo:

1. Cando os descendentes que se computaron por metade deban computarse na súa totalidade, ou deba computarse o mínimo familiar por ascendentes, de acordo co previsto no artigo 78.3.d) do regulamento do imposto, o contribuínte comunicará esas circunstancias por escrito ó pagador dos rendementos do traballo, sen que tal comunicación deba axustarse ó modelo a que se refire o segundo parágrafo do artigo 82.1 do regulamento do imposto, e quedando este obrigado a conservar-la comunicación debidamente asinada.

2. O pagador poderá practicala regularización, nos termos previstos no artigo 81 do regulamento do imposto, en calquera das nóminas correspondentes ó período que media entre a recepción da comunicación e a última do exercicio 2000.

Disposición derradeira única. *Entrada en vigor.*

Este real decreto entrará en vigor o día seguinte ó da súa publicación no «Boletín Oficial del Estado» e terá efectos desde o día 1 de xaneiro de 2000.

Dado en Madrid o 20 de outubro de 2000.

JUAN CARLOS R.

O ministro de Facenda,

CRISTÓBAL MONTORO ROMERO

MINISTERIO DA PRESIDENCIA

18915 *REAL DECRETO 1735/2000, do 20 de outubro, polo que se aproba o Regulamento xeral de ingreso e promoción nas Forzas Armadas.* («BOE» 253, do 21-10-2000.)

A Lei 17/1999, do 18 de maio, de réxime do persoal das Forzas Armadas, ademais de regula-lo réxime do persoal militar profesional que integra a categoría de tropa e mariñeiría no novo modelo de plena profesionalización dos exércitos, definiu o sistema de ensino militar e as formas para acceder a el ó lle dedica-lo seu título V ó ensino militar e, dentro del, o seu capítulo III ó acceso ó dito ensino. Tamén hai que ter en conta para os efectos do acceso ás Forzas Armadas a regulación da provisión de prazas contida na devandita lei.

Por este real decreto procédese a aprobar un Regulamento xeral de ingreso e promoción nas Forzas Armadas de desenvolvemento dos citados aspectos da Lei 17/1999, do 18 de maio, cun carácter integrador, ó regular tódalas formas de acceso ó ensino militar de formación tanto para incorporarse ás diferentes escalas dos militares de carreira, por vía de acceso directo, por promoción interna e por cambio de corpo, como para adquirila condición de militar de complemento ou militar profesional de tropa e mariñeiría. Este carácter integrador tamén se manifesta coa inclusión do acceso dos militares profesionais de tropa e mariñeiría a unha relación de servicios de carácter permanente e o cambio de adscrición a corpo dos militares de complemento.

Punto de referencia para a súa elaboración foi a experiencia adquirida na aplicación durante os últimos anos do Regulamento xeral de ingreso e promoción nas Forzas Armadas e Garda Civil, aprobado polo Real decreto 1951/1995, do 1 de decembro, que supoñía unha actualización do Real decreto 562/1990, do 4 de maio, que desenvolvera inicialmente a Lei 17/1989, do 19 de xullo, de réxime do persoal militar profesional, nestes aspectos.

En relación coa anterior regulamentación exclúese con carácter xeral o tratamento do acceso ó corpo da Garda Civil, que deberá te-la súa regulación específica en desenvolvemento da Lei 42/1999, do 25 de novembro, de réxime do persoal do corpo da Garda Civil, coa única excepción que esta propia lei establece no seu artigo 20, ó determinar que os que accedan directamente ó ensino de formación para a incorporación á escala superior de oficiais cursarán unha primeira fase na Academia Xeral Militar do Exército de Terra, polo que o número de prazas, os requisitos e as probas para o ingreso se rexerán polas normas establecidas para as escalas superiores de oficiais dos corpos xerais dos exércitos. En consecuencia, neste real decreto a Garda Civil ten un dobre tratamento. Por un lado, establécese un réxime transitorio con carácter xeral ata que se proceda á aprobación da súa regulación específica e, por outro, o ingreso por acceso directo á escala superior de oficiais do corpo remítase á aplicación do Regulamento nas mesmas condicións establecidas para os corpos xerais dos exércitos.

No regulamento adquire especial importancia, ó ser elemento imprescindible no novo modelo de Forzas Armadas plenamente profesionais, o acceso a militar profesional de tropa e mariñeiría, para o que se establecen, de acordo co artigo 68 da Lei 17/1999, do 18 de maio, as normas que permitan alcanzar e manter, nun proceso continuo, os efectivos de militares profesionais de tropa e mariñeiría dos exércitos, definidos de acordo co planeamento da defensa militar e tendo en conta os créditos establecidos nas leis de orzamentos xerais do Estado.